



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8



**North Korea-i nuclear arms
yanglutsü tashi ulushir: IAEA**

**France nunger asayar Ekitike yiruba
sülen World Cup masayatetsü**

VOL. XXIII ISSUE NO. 182 (ADOK 182) DIMAPUR YANGTEPNÜ (THURSDAY) RONGCHII (APRIL) 16, 2026

₹ 5.00

Mizoram nung telungpur khuret anenogo

Aizawl, April 15, 2026 (Agencies): Mizoram sorkari April 14, 2026 nü Lalhmingthanga Sanate-i aniba Hmar People's Convention (Democratic) den yimjung tenangzüktep nung sign süogo. Iba ajanga Mizoram nung küm aika telungpur khuret aliba anenogo.

Sakawrda nung Mizoram Home Secretary David Lalithantluanga aser HPC(D) president Lalhmingthanga Sanate nati Memorandum of Settlement nung sign sütep. Sakawrda ya Sinlung Hills Council atema administrative centre lir.

Iba tenangzüktep nung Sinlung Hills Council kübok Hmar nunger teimba ser aliba tesemtem asoshi development plan ka dena lir. Sorkar nungi senotsü teyari teimba agütsütsü, special development initiative, public infrastructure tajungba akümtsü aser transport o communication facilities akangshitsü iba MoU nung lateta lir.

Iba MoU nungsa Sanate telok nungi telungpur 43-i parnok prangpong agütsütsü aser civilian ama alitsü lateta lir. Iba asoshi April 30 nü Sesawng nung aliba Central Training Institute nung "homecoming" ceremony ka agitsü.

Iba tenangzüktep ajangasa Sikpui Ruoi agizüker aser iba ya Hmar nunger asoshi

tongtipangtiba sobaliba benjung lir. Iba benjung ya parnoki kümshia December 5 nü amunger.

"Mizoram-i tesüiba nunga Hmar teloktem den ibala mesükba tenangzüktep agiogo. 1994 aser 2018 nung tenangzük agi aser tang 2026 nung tesüsabuba tenangzüktep ajanga yimjung maparen tuluba akümer" ta Home Secretary Lalithantluanga-i ashi.

"Iba movement ya küm 30 tema inyaka aruogo aser iba mapang timtem aser tekangshi jenti ajuruogo. Asenoki meshiba original demands ajakbo mangur saka iba agreement ajanga tejakleni aotsü aser putepshitsü lenmang lapoktsür" ta Sanate-ia ashi.

HPC(D)-i Sinlung Hills Council area administration nung temelenshitem meshia liasü. Parnoki District Council aser Minority Affairs Department nem tashi agütsütsü, senotsü teimba agütsütsü, infrastructure tajungba akümtsü aser shisaliok rejutem amenoktsü akhanger.

Parnokisa Hmar Martyrs' Day aser Sikpui Ruoi official local holidays ama agizüksü takhangba agütsü.

1996 küm Hmar telungpur telok asem akümba nungi Sanate-i aniba telok ya tatembangba lir. Tanü iba tenangzüktep agiba ajanga Mizoram nung armed movement tembangogo.

Manipur nung olulu ka ajanga Thinungei nung lendong atalok: Home Minister

Imphal, April 15, 2026 (Agencies): Bishnupur district kübok Thinungei nung lendong atalokba ya civilian aser security forces tsüngda mangatettep ka ajanga liasü ta Manipur Home Minister Govindas Konthoujam-i ashi.

Iba lendong atalokba atema sasaa bilemer aser olulu ka prokshiba ajanga tensa mejungi aküm. Tetsür kati sangdongba osang ka ajanga nübortem petsaprongtep aser sepaitem den rara, iba lendong nung nisung aika yiruogo ta Minister Konthoujam-i ashi.

Paisa nübortem dang süngjema alitsü aser lenmang menoktangtsü mepishia metetdaksür. Public-i ketdangpurtem den amalitep alitsü aser Tronglaobi tatalokba atema bushisüngdangertem den yaritepsü ayongzüker, ta paisa ashi.

Tronglaobi bomb lendong atema National Investigation Agency (NIA)-i bushisüngdang südar. Tang tashi nung United Kuki National Army (UKNA) züngsem pungu puogo aser maneni bushitepdar ta Home Minister-isa metetdaksü.

Thinungei tatalokba nung lungkak aitertemi prangpong 8 rakzüka bener ao saka security personnel-i itemji meyipa nguogo ta paisa ashi.

"Manipur nung sepa 34,000 tema mapa lemkükja lir saka ano sepa 7,000 tema nüngdaker. Mapa tazüngtem asoshi recruitment drive ka yakta agitsü" ta Konthoujam-isa metetdaksü.

Manipur nung law and order tensa nung ajemdaker shisaliok rejutem lapoktsü lemtet agitsü. sorkaribo tekaratiba nung academic maparen tenzüknür ta paisa ashi.

AFI-i Nagaland aser Northeast nung athletics ajungkettsü atema "Kohima Declaration" renem



Kohima, April 15, 2026 (TYO): Athletics Federation of India (AFI)-i Nagaland aser Northeast nung athletics renlokdaktsütsü atema "Kohima Declaration" agiogo.

Iba declaration kübok AFI-i yaritepsü, rejutem sendaktepsü, infrastructure nung yaritsü aser national o international competitions atema Northeast ajungkettsü maparen inyaktüsü.

Kohima nung anogo ananü Annual General Meeting nung parnoki iba sangdong agütsüogo. Iba sangdong ya national sporting ecosystem nung Northeast sendaktepsü asoshi temulung agüja renemba lir.

"Senden nung onük aika benoka lemsatepogo aser saisapong tashi aitsü atema tongtipang lemtetem agiogo" ta South Asian Athletics Federation president Lalit K. Bhanot-i ashi.

AFI-i national competitions nung shilem agir athletes ajak dak SRY gene testing asütsü lemtetogo aser iba atema senotsü ya AFI-i sorkar den yaritepa agütsütsü ta pai ashi.

AFI-isa research aser performance mapping atema athletes dak DNA testing asütsü aser mezüng atema

athletes 100 shi dak tendangtsü ta Bhanot-isa ashi.

AFI-isa district-level bodies yanglushitsü telemteba agiogo aser iba ya district headquarters nungi züngsemtem ajemtsü aser villages o blocks nungi nübotem züngsemtsüba lir ta paisa shisem.

Linük ajungalen athletics nüngtugu kümdaktsütsü atema AFI-i kümshia August 30 nung districts 700 shi ka nung annual 2-kilometre race ayonga agitsü ta Bhanot-isa metetdaksü.

"AFI-i non-performing state units dak mapa inyaktüsü aser Chhattisgarh o Arunachal Pradesh nung tang aliba teloktem anentsütsü aser ad hoc committees agi melentsü" ta AFI Vice President & World Athletics president Adille J. Sumariwalla-i ashi.

Tripura aser Manipur watch list nung ayur aser voting rights maliba associate members ama kümdaktsür, ta paisa ashi.

India nung jenjang tajungba akümtsü asoshi senior aser junior athletes atema foreign high-performance directors shimogo ta paisa shisem.

AFI-i Northeast nung technical support agütsütsü aser iba nung coaching, local officials

training aser talent identification dena lir ta Sumariwalla-isa metetdaksü.

Infrastructure renloksüba ya state sorkar tebilemstü lir aser AFI-i overall ecosystem aser human resources tashi itshitsüba nung temulung agütsütsü ta paisa ashi.

Nagaland nung national aser regional competitions ayonga amungtsü aser iba nung inter-Northeast sentongtem adentsü ta paisa ashi.

"AGM ya otsüsütsü sentong ka lir aser Nagaland nung tang mezüng atema national sports federation kati AGM agiogo" ta AFI Vice President & Nagaland Athletics President Abu Metha-i ashi.

Iba senden nung onük ajak benoka jembiogo aser telemteba balala ajanga linük nung aser talisa Northeast nung athletics renloka aotsü ta paisa metetdaksü.

Nagaland sorkar aser nübortemi pelashishia agizükba aser yariba atema tenüngsang agütsür. Kohima Declaration aser AGM nung lemtet balala ajanga India nung athletics renlokba nung mera tulu ka agitsü ta AFI tanishirtemi metetdaksüogo.

Governor Nand Kishore Yadav-i Phek semdang

Dimapur, April 15, 2026 (TYO): Nagaland Governor Nand Kishore Yadav-i April 15, 2026 nü Phek district semdangogo.

Iba mapang pai Phek nung Civil Society Organisations den ajurutepa sensaksem aser sorkar department balala den senden amen.

Governor Yadav-i district administration, lokti lennirtem, civil society organizations aser Phek nung alirtem dang pa pelashishia agizükba aser

sasapelaa yaritepba atema pelaba ashi.

Governor-isa MLA tem, kin teloktem, mulungtet teloktem aser administration den külemi yaritepa inyaktüsü tenangzükba lir ta metetdaksü.

Pai Phek district semdangba ya terenlok nüngdakbatem aser nübortem taginübatem angatetsü atema dang masü saka amalitep aser külem tebilemstü khuret tangatetba akangshitsü atema lir ta Governor Yadav-isa ashi.

Paisa sorkar department balala den senden amandang Health & Family Welfare, School Education, aser Rural Development-i PowerPoint presentations ajanga parnoki tang inyakba mapatem indang osang lemsatep.

Iba sentong nung Chakeshang public tenüng nung Chakeshang Public Organisation (CPO), Vezuhu Keyho-i o jembi aser Phek Deputy Commissioner Rhosietho Nguori, NCS-i anküp tepela o jembi.

Naga nung New Delhi dak dang metaloker lira terenlok makatsü aser alar tia nung alitsü : Prof.Lanu Aier



Fazl Ali College nung Red&GoNE 2026 ta asüba sentong nung tongti o jembirtem, FAC Principal aser sentong nung shilem agitsüpurtem külemi tangokba noksa

Fazl Ali College, Rongchii/ April 15(TYO) : Fazl Ali College nung tanü nungi tenzüka April 15 aser April 16 nü agitsü asoshi A Two-Day National Conference, Reimagining Development and Governance in North East India : Pathways for Inclusive and Sustainable Futures” (ReD&GoNE 2026) ta asüba sentong International Quality Assurance Cell(IQA) FAC achaayang kübok department of Economics, Political Science & Sociology ajanga ketdangsüa kadagi.

Anogo ananü agitsü aliba sentong tenzüka nung Dr.Adangla Changkija, Assoc. Professor & HoD (Sociology), Program Convenor, ReD&GoNE 2026 ketdangsüba nung sentong agia tenzük, sentong nung tesem balala nungi arua adenrtem pela agizükba o Dr.I.Wati Imchen Principal FAC & Patron ReD&GoNE 2026 ajanga jembir aser tepela o aser sentong nung nungtakba tongtipang temetetsütem Smt. Bendangsenla Coordinator, IQAC, FAC-i jembir.

Iba sentong tamendakba

aser nukjidong dak rangloker Prof.Lanu Aier, Retd. Professor, Department of Sociology, NEHU ajanga jembidang terenlok ta asüba ya tagitsü o tajung rongnung ka lir, terenlok ya mapa ka inyaka temelenshi bener aruba lir. Terenlok ta asüba ya shisadangra iba ya kanga dang tekümdangtsü ka lir, kechiaser iba terenlok ya tejakleni aoba terenlok asütsüa akok mesüra tesüleni aoba asütsüa akok ta ashi.

Naga nungeren terenlok indangji reprangdangra taoba mapangtem nungi tang tashi nung Naga nungeren dangi sen arubatemji tiimi amshitet asübo Naga lima ya tang ama masü saka mamangtetsüsa renloka or lila saka mamshitetba ajanga Naga nungeren lung putu nung ama lir, kechiaser kidanger state-temjibo Naga nungeren den masadangtetsüsa renloker lir ta Prof.Lanu-isa lemsatet.

Prof.Lanu-isa Ao kin indang süoka jembidang nübur aikati Ao kinji tangar dang nungi kanga dang temaba jenjang nung renloker lir ta jembir, süra tang Ao kin

rongsenketsung, Politics, shishilembaba aser tamangbaren kechi jenjang nung lir? Ao kin temelenshi ka asoshi khen züngkümsüshitsü kanga dang nungtaker ta ayongzükba liasü.

Naga nungeren tang tia ya jung junga asadagra nüchi akümtsü asoshi kanga dang nungtaker, nüchi küma terenlok akatsü asoshi saksalemtsüla. Naga lima nung mulungtet telok(civil society) aika dang lir, mulungtet teloktem jagi Naga lima terenlok asoshi shisatsü agütsütsü kanga dang nungtaker. Naga nungeren tang ama dang New Delhi dak metaloker lira terenlok makatsü aser alar tia nung alitsü ta ashi.

Anogo ananü sentong agia aodang sentong balala nung onük balala nung ajemdaker Wb.Amba Jamir Independent Policy Analyst & development Strategist, Guwahati, Assam, Prof.T.T.Haokip Department of Political Science, North-Eastern Hill University aser Dr.Limakumba Walling Assistant Professor, School of Economics, University of Hyderabad parnoki jembitsü.

TaFMA-i Kisama nung World Art Day amung



TaFMA ketdangsürtem aser World Art Day nung shilem agirtem April 15, 2026 nü Kisama nung tangokba noksa.

Kohima, Rongchii/April 15 (TYO): Tanü Task Force for Music & Arts (TaFMA), Nagaland ajanga Toyota Ki, Kisama nung World Art Day munga state nung school balala nungi noksa yanglur akumtsü jangra aliba lanurtemi shilem agia liasü.

Iba sentong tenzüka jembidang TaFMA chairman Theja Meru-i lanurtem dak 'creativity' aser 'artistic expression' adokdaksütsü

tongtipang lir ta ashi.

Pai lanur noksa yanglurtem dang pei tejanraba nung temulung agüja alitsü ajungshi aser art ya pei tebilemba lemsatetba kisung masü saka sobaliba wazüka ayutsü aser otsü ashitsü atema tashi tulu aliba hadir ka lir ta ashi.

Pai maneni shilem agirtem dang pei sempet bushitsü, yimya balala nung tendangtsü aser pei tera aser meketa aliba nungi akasotsü ayongzükba liasü.

Yimya tajung amshitsü aser tezü metangi meranga inyaksü tongtipang aser tanen makai bushia tejanraba alitsüla, ta Meru-i ayongzük aser TaFMA ajanga sempet alirtem mapa sayutsü aser alimai metetsü atema sapang aser maangka agütsütsü ta shia liasü.

Iba sentong nung sensaksemba, creative displays, aser kaketshir temi shilem agia pei noksa yangluba sempet tem sayua liasü.

Lighthouse School Complexes atema GRM portal semzükogo

Dimapur, Rongchii/April 15 (TYO): Department of School Education kübok Nagaland Education Project-The Lighthouse (NECTAR) ajanga Lighthouse School Complexes (LSC) atema Grievance Redressal Mechanism (GRM) Portal ka Hotel De Oriental, Kohima nung April 14, 2026 nü School Related Gender Based Violence (SRGBV) Committees orientation sentong aliba mapang semzükba liasü.

Iba portal ya Alun Hangsing (NCS Retired), Chairman, Nagaland State Commission for Protection of Child Rights (NSCPCR) ajanga semzüktsü. Iba portal nungya Government Schools nung SRGBV cases ajanga osang kera-kera agütsütsü aser tajungtiba nung bentetsü.

Shashank Pratap Singh, IAS, Principal Director, DoSE and Project Director, NECTAR ajanga sentong nung pela agizükba o jembidang GRM ya court totuyuba tem, United Nations aser World Bank temi melar, ta ashi.

Singh-i Committee züngsemtem teinyaksü rateta ashi aser kakets reju ya ki aser kibong ulushiba ka asünungji, School Heads aser Teacher Counsellors temi kaketshir asoshi timtem kecha maliba 'atmosphere' agütsütsüla, ta ashi. Singh-isa Committee

züngsemtem dang gender-based violence sensitively indang juvenile cases tem counselling teyari agüja amshitsü ajungshia liasü.

Alun Hangsing (NCS Retired) Chairman, NSCPCR ajanga iba sentong ayongba nukjidong ratetja jembidang, tesüiba mapang linük balalai tanur temedem süoki ia agiba ajanga linük yimchiyimjunga aliba aser Human Development Index jenjang tajung akumba indang lemsatetba liasü.

Tanurtem temeden ya kanga tongtipang asüba yong Indian Parliament-i National Commission for Protection of Child Rights (NCPCR) tentet aser iba sülen Nagaland State Commission for Protection of Child Rights (NSCPCR) ya amenok, ta pai ashi.

LSC SRGBV Committee züngsemtem mapa jenti lir, anungji iba policy tajungtiba nung mapa kuma inyaksüla, kechiaser nukjidong ya tarutsü jenjang ajungtsü aser danga linüktem den sako kumdaksütsü asoshi lir, ta Hangsing-i ayongzük.

Anogo ka orientation nungya district 17 nungi SRGBV Committees züngsem 97 den Social Welfare Department, Police, Childline, DHEW, Sakhi One Stop Centre, Students' Union Representatives, School Heads aser Teacher Counsellors tem dena liasü.

Dimapur nung WhosThat360North east Influencer Yatra ayongzük



Dimapur, Rongchii/April 15 (TYO): Oriflame-i bener arutsüba WhosThat360 North East Influencer Yatra tanü Dimapur tongogo, koba linük nung regional influencer campaign tulutba ama Northeast India ajunga sema jajar.

Town Hall, Super Market, Dimapur nung iba sentong ayongzükba nung kaketshir 500 dak tema den beauty enthusiasts aser local influencers tem adenshia shilem agia liasü.

Sentong nung Oriflame Beauty aser Wellness Partner Truck ajanga live beauty masterclasses, skincare workshops, creator auditions aser hands-on product discovery sessions ayongzükba liasü.

Shilem agirtemi Oriflame indang skincare, cosmetics aser wellness products tem tendanga liasü.

Iba Yatra ya creators, kaketshir aser tetsürtem beauty, fashion, food, travel, wellness aser lifestyle nung lenmang

sayutsüsa yanglur, koba entrepreneurship atema lenmang ka lir.

Oriflame indang Brad Partner program ajanga shilem agirtemi pei meyong business tenzüktetsü aser quality tajung products tem ajungkettsüba mapang sen lenmang lapoktsü.

Iba Yatra nung WhosThatNEStar ya tongtipang shilem ka lir, kong kentener, tsüngsanger, comedians, spoken word artists aser content creators tem pei sempet sayutsü asoshi open talent hunt ka lir. Yimti shia nungi tajungtem grand finale atema shimtsü, koba May 10, 2026 nü North East Creator Awards, Kolkata nung tokteptsü, kong digital creators, brand partners aser media representatives tem adenshitsü.

Iba Yatra yagi Shillong, Agartala, Aizawl aser Dimapur semdangogo aser tang Kohima, Guwahati, Nagaon, Dibrugarh, Itanagar, Darjeeling, Siliguri, aser Durgapur tesem semdanga jajar Kolkata nung tembangtsü.

Samrat Choudhary-i Bihar Chief Minister tenangzükba agi



April 15, 2026 nü Patna nung Bihar Chief Minister tasenba, Samrat Choudhary (abelen nungi tasembuba) leniba nung mezüngbuba cabinet senden amendang tangokba noksa nung angur.

New Delhi, Rongchii/April 15 (Agencies): Bodhbarnü Samrat Choudhary-i Bihar chief minister tenangzükba agiogo; Bihar nung BJP nungi mezüngbuba Chief Minister ji pa asütsü.

Pa den külemi JD(U) nungi lenir anatia minister tenangzükba agiogo.

Lok Bhawan nung state Angh, Syed Ata Hasnain-i ketdangsüa Choudhary nem CM tenangzükba agidaktsü.

Iba sentong nungji JD(U) Tir Nitish Kumar, Union Minister J P Nadda aser NDA teloktep nung densema aliba LJP(RV) nung tongti, Chirag Paswan nungera liasü.

Samrat Choudhary nem

tenüngsang agüja Ato kilonser Narendra Modi-i X ajanga, "Samrat Choudhary-i Bihar Chief Minister tenangzükba agiba atema pa nem tenüngsang tulu agütsür! Pa dak aliba tashi, nübur nendaka tenzükba aser pai aika ajangshia aliba ajanga state kanga tajanzük angutsü. Pa lenisüba kübok nüburtem taginüba ataloktsü aser Bihar nung lenla ajak nung terenlok alitsü ta ni tamang akar," ta metetdaktsü.

Arrshi küm 57, Choudhary ya Mongolbarnü BJP legislative party lenir shima liasü, iba sülen Bihar minister Dilip Jaiswal-i, "Kobi melii NDA legislative party senden amentsü aser iba

senden nungji Samrat Choudhary tenüng sangdongtsü aser pai chief minister tenangzükba agitsü," ta metetdakja liasü.

Choudhary-i NDA sorkar nung tongti shilem agia liasü aser Home Minister teinyakdak liasü. Choudhary ya Shakuni Choudhary'er jabaso lir. Tamalen pa mapang tatsüka Rashtriya Janata Dal aser Janata Dal (United) na nung liasü aser 2017 küm BJP nung adenba sülen nungi pa jenjang tajungba-tajungba dang aküm.

2023 küm pa Bihar BJP Tir shima liasü aser 2025 küm assembly election nung takok anguba sülen deputy chief minister inyak.

Opposition party temi delimitation anema vote agütsütsü: Kharge

New Delhi, April 15 (Agencies): Opposition party tem aikati longjemer Parliament nung Constitution amendment bill nung aliba delimitation anema vote agütsütsü telemtetba agiogo, ta Bodhbarnü Congress Tir, Mallikarjun Kharge-i metetdaktsü.

Paisa, opposition party temi Womens' reservation anema menokdaker, ajisüaka iba bill benokba inyakimji anema nokdaker, ta metetdaktsü.

Bodhbarnü opposition INDIA teloktep nung aliba party tem nungi lenir aika Kharge'er kidang adenshia Brihostibar nungi anogo asemnü amentsü aliba Parliament senden atema asalentong lemsatepa liasü. Iba senden nungji Aam Aadmi Party (AAP)-a aden.

Anogo asemnü senden nungji sorkari women

reservation bill den Constitution amendment bill benoktsü tebilemba lir.

Kharge-i, "Onok ajaki women reservation bill pusemer, ajisüaka iba reservations benokba inyakimji onoki anemer. Iba ya yimtenren tsütsü nungi lir. Opposiion party tem ola madokdaktsütsü nükjidong nung sorkari iba ya inyaker," ta ashi.

"Onoki maneni women's reservation ya pusemer. Onoki tamalen agizükba amendment benoktsü akhanger. Parnoki (BJP-i aniba sorkar) delimitation dak sendakba nung tasa asar. Anungji party ajaki longjemer iba bill anema nokdaktsü telemtetba agiogo," ta pai ashi.

Congress lenir Jairam Ramesh-i, Delimitation Commission inyakimji ajanga ruling party atema iba ya

majority angutsü hadir ka kümogo ta jangjar, ta metetdaktsü.

Paisa, "Women's reservation ji mapa küma benoktsüla saka onoki delimitation bo khenyongi magizüker," ta metetdaktsü.

Iba senden nungji video conferencing ajanga adenertemji DMK nungi T R Baalu, RJD nungi Tejashwi Yadav, Trinamool Congress nungi Sagarika Ghosh, Shiv Sena (UBT) nungi Sanjay Raut, NCP-SCP nungi Supriya Sule aser SP Tir Akhilesh Yadav nunger liasü.

Iba senden nungji CPI lenir Annie Raja, CPI-M lenir Nilotpal Basu, AAP lenir Sanjay Singh, IUML nungi E T Mohammed Bashir, RSP nungi N K Premachandran aser Congress general secretaries- K C Venugopal aser Jairam Ramesh nunger aden.



April 15, 2026 nü New Delhi nung Congress Tir, Mallikarjun Kharge'er kidang opposition party balala nungi lenirtem senden amendang tangokba noksa nung angur. Iba senden nung Congress lenir KC Venugopal, Shiv Sena (UBT) lenir Sanjay Raut, NCP(SP) lenir Supriya Sule, TMC lenir Sagarika Ghose aser DMK nungi TR Baalu nunger densema opposition lenirtem aika aden.

West Asia rara ajanga India nunger million 2.5 sensak tia aitsü: UN

New Delhi, Rongchii/April 15 (Agencies): Tang West Asia nung rara ajanga India nung nisung million 2.5 sensak tia aitsü akok, ta United Nations Development Programme (UNDP)-i report ka ajanga metetdaktsü.

'Military Escalation in the Middle East: Human Development Impacts Across Asia and the Pacific' ta ajaba report nungjisa energy shibelenba lenmangtem, rong lenmangtem aser shishilembaba networks aika raksaba ajanga Gulf region dak metalokba linüktem aika rongsenkettzüng jenjang mejungi akümtsü, ta shia lir.

West Asia nung rara ajanga aliba nung nisung million 8.8 sensak tia aitsü aser ibaji ajanga South Asia tamajungba kongshitsü, ta UNDP-i asadangteter.

Tang West Asia nung rara ajanga India nung nisung lakh 4 shibo sensak tia iogo aser rara manenra India nung nisung million 2.5 sensak tia aitsü.

UNDP-isa, India nung sensak tia shilem 23.9 aliba

nungi shilem 24.2 akümtsü aser nisung lakh 24 below the poverty line (BPL) küboki aitsü, ta metetdaktsü.

Energy supplies atema India-i West Asia dak tuluka metaloker aser totzü shilem 40 aser liquefied petroleum gas (LPG) shilem 90 bo Gulf region dak metaloker.

India nung nungdakba fertilizers shilem 45 bo West Asia linüktem nungi abener, ibayongji Gulf region nung rara aliba ajanga item ajakji kongshir.

Alima tesem ajaklen LNG jenjang tujen atur, aser iba jagi India-a kongshir.

Ano külen West Asia nung rara ajanga India, Pakistan, Bangladesh, Nepal aser Philippines densema South Asia nung aliba linüktem aika nung chiyungtsü security-a mejungi akümer.

Iba dak alia Gulf linüktem den shishilembaba jenjang raksaba ajanga India nung imports/exports sectors nung inyakertem aika mapa makai akümtsü, ta UNDP-isa metetdaktsü.



April 15, 2026 nü Hooghly district nung Santipur constituency nungi CPI (M) candidate, Soumen Mahato-i nüboyima senzüdang rong nungi lokti dak teka ayiploksüba noksa nung angur.

Chhattisgarh nung Judge ka leniba nung Uniform Civil Code draft asütsü

New Delhi, Rongchii/April 15 (Agencies): Chhattisgarh nung Uniform Civil Code (UCC) draft asütsü atema Bodhbarnü cabinet-i retired judge ka leniba nung high-level committee ka tentetsü atema telemtetba agiogo.

Bodhbarnü Chief Minister Vishnu Deo Sai leniba nung cabinet senden amenba mapang nung UCC draft asütsü atema luden ka tentetsü lemtet.

Iba luden nung tongtiji retired judge, Ranjana Prakash Desai asütsü aser züngsemtem shimtsü atema chief minister nem tashi agütsüogo.

Tang Chhattisgarh nung kiyimba, balalulaba, senmang, tangar tanur pei chir ama agiba mesüra kibong dak sendakba ken otem ajak yimsü nung ajemdaker benteter, ajisüaka kodang UCC ji agizüka benokdir ibaji ajanga dang item ken o ajak bentetsü.

India temzüng kübok Arrla 44 ajanga senso ajak atema Uniform Civil Code renema

benoktsü atema state nem tashi agüja lir.

Yimsü nung ajemdaker 'personal laws' ajanga item ken o bentetba ajanga legal tsütsü ajak balala züngshir aser obendang agütsüba tsütsü timtem aika adoker, ibayongji yimsü ajungkettsütsü aser atsüapong kasa züngshitsü nükjidong nung UCC benoktsü, ta ketdangsertemi metetdaktsü.

Committee jagi sensotem, organisations aser mongintem dang nungi tebilemba asüngdanga shisa agitsü aser web portal ka ajanga-a tebilembatem asüngdangtsü.

Item telangzüba nungji ajemdaker UCC draft asütsü aser cabinet matsüngdang benoktsü. Iba sülen state assembly nung benoka agizüktsü.

India nung UCC mezüng agizükba state ji Uttarakhand lir. Uttarakhand nungbo yaküm January ita nungi tenzüka UCC benokogo aser taoba ita Gujarat state assembly nunga UCC Bill, 2026 agizükogo.



TIR YIMYIM

YIMOBILEM (EDITRIAL)

DIMAPUR THURSDAY, APRIL (RONGCHII) 16, 2026

Tsürabur lima

L iso Darsen ta ser tawa Mongsenyimti Kaketshir Telungjem Dimapur purtemi pei tsürabur lima semdangba sentong ka ayongzüka akabaji pei tetsü taso lima toktsür joko bendang balala nung senso kuma alir lanurtem asoshi tanü putu nung kanga nungdakba mapa ka inyaka sayuogo ta pelaa bilemer. Atangji, iba amaji pei tsürabur lima semdangba sentongji Dimapur Ao Baptist Arogo nung lanurtemia küm shia ayongzüka agiba angashir aser ano Mopungchuket kaketshirtemia pei tsürabur yimtsüng semdangba sentong agia aruba osanga angashiogo. Kasa sentong amaji tanga lokti aser yimtsüngtemia agia ali alitsü südi, kechiyong alima nung nisung ka aoshi pei poktetdak tesem metettsü aser angutsübaji kanga tongtibang lir. Asenoki moa, tanü putu nung asenok Aotsür Aortem aika Kohima aser Dimapur nung dang masü saka bendang lima agi pei senso lima kümer yimti aika nung sobalibaa odagi. Aji oda, pei tetsü taso lima nungi pilar, joko, bendang lima agi pei lima kümer alirtem asoshi pei poktetdak, pei tetsü taso lima angutsü aser metettsübaji dang masü saka pei kinunger adianu, yimtsür yimer aser pei nübortem jenjang reprangdangtsübaji senso shia asoshi kanga nungdaker. Iba tangatetba dang jagi arua tanü kaketshirtemi pei tetsü taso lima bushia oagi pei yimtsür yimer aser kinunger-adianutem libaliru dang masü saka pei lipok otsü angazükba aser pei lushi anguba jagi pei tetsü taso lima tali meim tenzüksü. Asenoki aiben alima tesem balala repranga jajatsü bilemdang, topur tajung tangar tashitemeteter limatemang repranga senzütsü bilemer. Ajia junger, kechiyong tangar tashitemeteter lima nung topur tajung yimtitem repranga jajaba nungji asenok tangazüksü aika lir. Iba jagi asenok nem tangatetba aser shisa tasen aika agütsür. Ajisüaka, alima nung tangar lima aser yimtitembo angu saka asen poktetdak asen tsürabur limabo mangu aser memetetbaji peisasa pei memeteti tesamalen i aoer asütsü. Aji oda, Nagaland nung Dimapur aser Kohima yimti nung alirtem dang masü saka asen nübortem talisa Guwahati, Shillong, Delhi aser Bengaluru ama yimtitem nung sensosa alir chirnurtemi pei tsürabur lima aser pei yimtsüng angutsübaji taküm nung tongtibang nungdak ka asütsü. Atangji, Aotsür Aoerbo ajak Mokochung district nung dang adenshia alitsüla ta masü saka akok tashi asenoka asen lima tuluba kuma alima sünga prokshia alitsü merangtsüla, kechiyong kong Aotsür Aor lidir, aji Ao lima asütsü. Iba tangatetba nungji kodang lidir, asenok kong lidir liaka asenok ajaki Aotsür Aoer mesüka awashi aser wainshin meteta aser Tsüngrem tsübua alitsü merangtsü. Tanübo Kohima aser Dimapur nunga asen nübortem senso kuma alitsüsa Tsüngremi asenok kanga moatsüba angur. Iba jagi, joko asenok asoshi Nagaland nunga Kohima aser Dimapur amabo bendang lima masü saka asen senso lima kümogo. Ibaji kodang asenoki angatetdir, asenoki asen alidak yimtiji meimadoktsü aser topur junga yunütsü. Ibaji kodang shisadangdir, joko Kohima aser Dimapur nung alir Aotsür Aortembo, tantsü tambu kar dak alaka, ajak temanga item yimtitem nungji dang aremtsü. Ibaji meteta, tanü Dimapur nung aliba Mongsenyimti kaketshirtemi pei tsürabur lima semdanga pei sobaliba aser otsüolem angazükba amaji, Dimapur aser Kohima nung alir Ao yimtsüng kaketshir telungjem ajaki pei tsürabur lima semdangba sentong küm shia ayongzüka ali nung junger. Atangji, Dimapur nung DABA-i ayongzükba amaji arogo aser kin telungjemia ayongzüksüa akok, saka iba jagibo pei yimtsüng tashibo anir moutettsü, anungji pei yimtsüng angutsü aser pei yimtsür yimer aser kinungertem kidang anenzüka metetteptsü aser pei sobaliba angazüksü asoshi pei yimtsüng telungjemi pei yimtaki aoba sentong yanglutsüla. Aji oda, bendang lima nung soa inteter lanurtem pei yimtak pei kinunger kidang anener, pei yimtsüng nung yimküm tzübu reprangdanga aser alu inyakba nung dena shilem agia amungba jagi, parnok shisa renloktsü aser alima tesem kong kechi inyaka lidir liang, pei tetsü tasoli kodanga mamadoktsü.

OLEMSABANG

JAKREPAYONG; AZUKARU NUNGI AYATAI (Asangsang nung ajangshiba nungi)

- Dr. Talimoa

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Pastorba sentep agidang aiben jepa yimer dang parnoki aibelenba Tsüngrem o ajanga jungkai adoka sayutsüngi. Pastorbai ochi jembi nung pa mesakloker aika kümadak. Kipoksema sarasadem aotsü kanga mesademi aküm. Pai jembiba o tajungji nü pang tu nung tzü mamong ama liasü. Yimdaklir tem-i ayatai anogotem ana nung lir ta yimdangi maru. Joko par yimdak pa jangratema alitsü tamakoktsü ta meteta mapa nungi anentsü arogo mungdang dangi shiti zulutsü bilem. Saka teyanglur Tsüngremi pa nem tangatetba shisatsü ka agutsü. Pa mapa nungi anener yim doktsür maodangsa yimertemi aibelenba angatetdakja Tsüngrem dang tadok nangzükba asentenshi sentong ka ayongzüksü pai sarasadema ata-a ali.

Yim raksar tanabuba kum yimdaki yimramanga wara tesashi ka aru. yimertemi ilangilanga aki ama süia aotsu ta bilem. Saka iba wara ajanga par yimer nisong tenet takum tempang. Terok tera mesaka aketer ta jilai taneptsü bushia aoba tashidak tamajung puteta yimdaki tasümang bener aruba aika liasü. Pastorba tenzükba wadang nung iba kum asü pila sentep sentong timtiba agi. Kodang ali agi parnok dak mang ayangtsü tenzük, parnoki medizüki kumadak. Sen anguba ajak kum ka tsüngda agimadak. Parnoki aki ama ali dangi meyip saka ali-i parnok magizük. Naro, sungjanglijang, tsünüsüngpongtsu aser alu nung tsük madang, ajak merema süadak. Tsürapurtem jepaka nuktzü malu, koda asutsu! Ayatai! ta asatep.

Iba kum suir kelen arogo-i asentenshi sendong ka ayongzük. Tsüngrem tenzük aser tanela pusemer aika jaoka parnoki asentenshi sentong agi. Yimertem ajaki parnoki inyaksaba angateta jepeteba sarasadembaji tesungmangtsu ola tulu liasu. Parnoki raksaba alima aneptsü kum aika agitsü ta meteta, ali nung nemeta, karibo ali nung melangshia tadok meshi. Saka ajakji, waro or tempang nung akoshi ama liasü. Iba sentong sülen parnok temolung nung tesenep angu, saka alishi nung kangshia alima doktsür asülimai oadok.

Iba kum pastorba mapa nungi anen aser tanga wadang inyaktsu jila yima ao aser idakji kum aika tenzük. Kum metsür pongu tashi pai iba yimdak tetsung majemok. Yimertemi arogo kum noklangjung benjung ayongzuba mapang pa tongti o jembir jaok (Kum metsür pongu sulen). Pa kodang yim atong, joko pai alima amak-amaka naro adoka angu. Pai menungraseta yimdong sema benzüa jaja, saka kanga azüng azünga kümer tejak tasen dang kar ajurua jembi. Tesüsa pai leper len reprang nung pa den kulem tenzüker aika leper long nung tenung ajener angu.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Khristantemi Sudan nung rara anentsü atema inyaktsü akhanger



(Abelen nungi) Tearfund nungi Esther Trewinnard, Islamic Relief nungi Suraiya Rahman, CAFOD Director Christine Allen, Christian Aid nungi Peter Robertson aser World Vision UK nung CEO, Fola Komolafe nung UK Parliament kima Sudan nung rara nokdangtsü atema takhangba agütsü dang tangokba noksa nung angur.

April 15, 2026: Tan hopta UK nung Khristan melungtet telok balala nungi lenirtemia UK sorkar dang Sudan linük nung civil war anentsü atema inyakdaksüner, ta takhangba agütsüogo.

Sudan linük nüchiso anguba sülen taküm küm 70 ajunger, ajisüaka iba linük raraba küm ajak senteper 42 jungogo aser tang-a teraradak.

Sudan nung civil war tenzükba sülen Bodhbarnü (April 15) küm asem jungogo. Sudan nung

Sudanese Armed Forces (SAF) aser Rapid Support Forces (RSF) na tsüngda rara manener aser item telok balala pusemer bendanger linüktema lir.

Sudan aser South Sudan atema All Party Parliamentary Group Chair aser MP, Anneliese Dodds leniba nung iba temepishibaji agütsü.

MP, Dodds-i, "Iba tensa ya kanga mejungi kümogo aser Sudan nungertemi joko matateter. Iba ama timtem tensa mapang ka nung teinyaktsü tim inyaktsü asoshi UK sorkari United Nations Security Council nung penholder maongka ya agia inyaktsüla. Nüburtem kümzüktsü aser timtemertem nem teyari agütsütsü atema inyaktsüla," ta ashi.

Nisung 40,000 dak temai sign süa aliba petition ji ajanga British sorkar dang Sudan nung rara anentsü, nüburtem kümzüktsü aser timtemertem nem teyari agütsüba lenmang lapoktsü atema inyakang, ta takhangba agüja lir.

CAFOD, Christian Aid, Tearfund aser World Vision densema Khristan organizations-a aikati iba petition pusemer.

Sudan nung rara ajanga

taküm küm tatemlen tashi nungbo chiyungtsü agi matuba nütsüng million 4.2 alitsü, ta United Nations-i asadangtetogo.

Sudan nung aliba El Obeid Arogo nung putir, Yunan Tombe Trille-i sangdong ka ajanga, "Yimtenren aser sepaitem tsüngda rara ka ama tenzuka liasü, ajisüaka tangbo ibaji ajanga alima nung meimchirtemi timtem tulutiba ajangshir. Nisung million aika jenshiogo aser aika aya-tzüra aser tetsübu nung aliba den külemi teimla ajak samaogo," ta metetdaksü.

"Raraba hadir mesüra bendangertem inyaksangshi ajanga Sudan nung yimjung marutsü, ajisüaka Sudan nung ajak taküm akhümket züngshia ken o jembiba ajanga dang linük nung yimjung alitsü," ta putirisa metetdaksü.

Nigeria police-i Khristantem puer aoba telok ka nungi züngsem 33 apu

Abuja, Rongchii/April 15 (Agencies): Taoba küm November ita nung central Kwara state kübok Tenla ki ka nungi Khristan 38 pua bener aoba dak sendakba nung Nigeria police-i ozüng alema inyaksangshiba telok ka nungi züngsem 33 puogo, ta police-i sangdong ka ajanga metetdaksü.

Linük ajunga nung iba amala ozüng alema inyaksangshiba telok azüoktsü asoshi tang jenjang agia aliba nung shilem ka ama item nisungtem ya puogo.

Federal police otongdar Anthony Okon Placid-i ashiba agi, iba telok yagi taoba küm November 18 nü Eruku jila nung Christ Apostolic Church amak. Parnok yagi nisung puer

aoba, kiset shiruru auyar aoba aser prangpong hadir balala bener rakzükkraktema auyaba nung shilem agia liasü, ta paisa shisem.

Kwara state aser kidanger Kogi state nung tesem balala mita aoba mapang ozüng alema inyaksangshiba telok nung densema alitsü südi, ta temulung melemi bilemer parnok 33 ya pua liasü.

Itangitertem nungi osang tejangja angazükba sülen mita aoba mapang item nisungtem ya apu. Ozüng alema inyaksangshirtem anema jenjang agiba mapang January ita nungi tenzuka tang tashi nung linük kübok tesem balala nung temulung melemi bilemer parnok 50 pua lir, ta Placid-i metetdaksü.

Nigeria ya mapang talangka security dak sendakba nung tetsükdaksü adoker kangshidar, kong sen akhangtsü asoshi nisungtem puer aoba, auertemi yimtsüngtem amakba aser telungpurtemi tesem balala amakba agi kanga timtema arudar.

Eruku amakba sülen sorkar kanga tali rongshia arudar. Nigeria ya U.S. tir Donald Trump-ia kanga junga asadanga arudar, shibai linük nung Khrista dak amangertem reshikangshiba anema military jenjang agitsü amokmerenogo.

Placid-i ashiba agi, police-i yakta temulung melemi bilemertem aika aitsütsü aser jenshia senzüa alirtem apuba den prangpong aser injangtem teimba bushitetyonga aotsü.

ANOGO ABEN TSÜNGREM DEN

Tsüngrem narong nung ken

Tangu aliba ajaki Kibuba tushiang. Kibuba sangang. T. Ken 150: 6.

"Ibaji kü narong nung ken, kol alongba ola angashia mechanic kati ashi, "Ibaji kü narong nung ken" ta kisür kati mapa inyakba ola angashia ashi.

"Ibaji kü narong nung ken" ta tesayuri school tanurtemi lesson azüngba angashir ashi.

Khristan ka ama asenoki tamang agi inyakba mapa ajak agi Khrista nem sentsüwangshi bener arutsür ta aseni amanger. Pa sentsüwangshi asoshi inyakba jagi Tsüngrem nem tenüngsang aser tetushi bener arutsür. Atangji Khrista mapa inyakba ola ajakji Tsüngrem tsüngdang topur tajung ken lir, 'kechiaser nisungi lenmang balala aisü nungi Pa tenüng asangba nung Pai pelar - tebilemba, jembiba, aser mapa. "Saka ni kentener masü" ta nai ashi. Ajisüaka Khristantem parnok sempettem aser tashi agi Tsüngrem asangtsu asoshi longjemba ajanga alima ajunga nung topur tajung ken adoker. Aseni koda sür kenji atongtepa aotsü? Yisu osang tajung tangar den lemsatepba ajanga. Asenoki ya inyak dang Tsüngrem tushiba aser külemba nung jenjang tali bendenloker.

Na meketa aliba nung angang. Ne ken parnok den tenang. 'Tangula akaba ajaki Kibuba tushiang'. Tangula alirtem rongnungji meimchirtem medensemka ma?

Ethiopia nung Khristantem anema inyakba kanga bulua akümer

April 15, 2026: Tawa Ethiopia kübok East Arsi Zone nung Khristantem anema inyakba kanga bulua kümogo; February ita tatembanglen nungi April ita tashi nung Khristantem anema inyakba tatalokba aika lir.

February 26 nü prangpong amer telok kati amakdang Orthodox Khristantem aika tepseta liasü, iba sülen February 28 nüa telok kati Tenla ki ka amak.

Prangpong amer telok ka Tenla ki telungi tua Khristantem dak injang khaloktsü; item tatalokba ana nung Khristan 20 dak tali tepset aser aika yirua liasü.

Ano March ita nunga East Arsi Zone kübok tesem aika nung Khristantem tepsetba, Khristantem ket nungi auyaba aser Khristantem aika jenshiba tatalokba aika lir. Item tatalokba ajak ya Khristantem anema apusoba lir, ta Arogo nung lenirtemi ashir.

Arogo nung lenirtemi item

tatalokbaji sashia aitsüogo.

Ethiopia nung Catholic putirtemi sangdong ka ajanga, "Tai maket Khristantem maneni tepsetba ya sendoka meyütsütsüla. Item tatalokba ya tangsa bushisüngdangtsüla aser Khristantem nem tekümzükba agütsütsüla," ta metetdaksü.

Putirtemisa, "Oromia Region kübok tesem aika nung tesünep mali aser nüburtem kümzuka mali," ta metetdaksü.

Khristantem tepsetba dang masü saka kiojen-a raksatsüba ajanga aikati tetsübu nung pei aliba tesem toktsür jenshiogo, aser aikati pei kidangi meyipa aotsü tsübur.

Akhidang nungi Khristantem aliba linüktem rongnung Ethiopia-a densema lir.

Aso 4buba mapang nungbo Khristan yimsü ya 'Ethiopia state religion' liasü, ajisüaka tanübo nütsüng shilem 61-67 dang Khristantem lir.

AO OSHI ANGAZÜKDAK:

TANÜ ANGAZÜKTSÜBA OJANG



Watok

(v) kotari agi rangdok (cut off by knife)

* Mozü kidang doctor-temi shiranger dak nungi komo watoka endoktsü.

Watsü

(n) tetsür tain (matured woman)

* Aotsür rongnung watsü tajung aika ngua pelar.

OLONG PAITEP # 7475

	1	2		3	4	5
6					7	
				8	9	
		10				
11						
			12			
13	14	15				16
17					18	

TIPLIN

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Repranzük
- 10. Tasola
- 11. S _____
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

LANGTSÜNGLEN

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. ____ hi
- 16. Akümüli nungi pilar

OLONG PAITEP # 7474 TELANGZÜBA

TIPLIN :

- 1. Telok, 4. Aluru, 6. Ozüng,
- 8. Emk, 9. Kin, 10. Teti, 12. Süir,
- 13. Jen, 14. Ola, 16. Talak,
- 17. Mazük.

LANGTSÜNGLEN :

- 1. Tenükjang, 2. Luden, 3. Kiooktsü,
- 5. Lenti, 7. Tajanzük,
- 11. Teronem, 12. Sempa,
- 13. Jahaz.

NAI-A YA METETTER



Italy nunger Giuseppe Damato-i April 13, 2026 nü world record tasen ka yangluogo aser iba ya men's 90-plus category nung lir. Damato ya taküm January ita arishi küm 90 jungogo aser pai Milan Marathon nung 4:30:30 nung asemteeta liasü.

CM Khandu-i Siang nung Rs 196.44 crore mapatong sayatsü



Itanagar, April 15, 2026 (Agencies): Arunachal Pradesh Chief Minister Pema Khandu-i Siang district kübok Riga yimtsüng semdang aser idakji Rs 196.44 crore alang mapatongtem lapoktsüogo.

Iba ajanga Siang district nung infrastructure aser public services ulushiogo.

CM Khandu-i road connectivity, education, administrative infrastructure aser public service delivery indang mapatong balala lapoktsü.

"Riga nung township roads tajungba akümtsü, circuit house tasen ka yanglutsü aser Siang district atema sports stadium ka

amenoktsü" ta CM Khandu-i o jembidang ashi.

State sorkari inclusive aser sustainable development nung temlung agütsür ta paisa ashi.

CM Khandu-isa terenlok mapatong balala inyaktü lung azüngtsüogo aser department tem dang amalitepa mapa inyaka aotsü tetuyuba agütsüogo.

Tripura sorkari Bengali New Year nung ango langlanga ayoktsü

Agartala, April 15, 2026 (Agencies): Bengali New Year (Poila Boishakh) amungtsü aliba jaldang Tripura nung Fisheries Department-i government-subsidised prices nung ango ayoktsü.

"Tripura nung departmental farms den cooperative fish farms nungi ango ayoktsü aser benjung mapang tesem ajaklen ango peria angutsü" ta Fisheries

Minister Sudhangshu Das-i ashi. Jenjang dalang agi ayoktsüba angotemji rohu, catla, common carp, mrigal, aser silver carp alitsü ta paisa ashi.

Maneni, Agartala nung aliba Maharajan Market nung Tripura Apex Fisheries Cooperative Society Limited ajanga hilsa ango jenjang dalang agi ayoktsü.

Benjung mongpu nung ango

jenjang tur ayoker aser iba ajanga kibong aikati senotsü talila enoktsüsa akümer, anungji iba maparen ajanga nübortem anisüngzük ngudaktsütsü ta Minister Das-isa metetdaktü.

Nisung ajaki senotsü khuret melii New Year amungtsü atema iba mapa inyaktü. April 15 nungi state kübok tesem balala nung subsidised fish angutsü ta paisa shisem.

A LABEL ISN'T JUST A STICKER
It tells a story directly linked to your health!

Here's what it reveals:

- Ingredients
- Manufacturing & Expiry Dates
- Allergens (like gluten, nuts)
- Sugar, salt & preservatives

#HarLabelKuchKehtaHai...

[fssaiindia](#)
[fssai](#)
[fssai_safefood](#)
[fssaiindia](#)
[fssai_india](#)

State Food Safety Authority,
Department of Health and Family Welfare, Govt. of Nagaland

For any consumer grievances, mail us @: foodsafetynagalandhelpline@gmail.com

MULUNGNEN O



13/08/1959

02/04/2026

Ozü tako marok nung shirnokisa onok den arua lemsatepogo, mamatetba tepela nenok ajak den lemsateper. Phone ajanga tongtepratepba, tsüngdong arua semdangba, ariabilem den sarasademtsüba ajanga onok shisabulu aser mulungzürep tia nung alidang tesünep nguogo. Temeim ojala taküm alidang nepurtem den lirua litetba indang nenok mapa tajung ajanga tali bilemtetshir.

Bangalore, Dimapur aser Mokochung nung doctors aser nurses-tem shirnoki ojala tajungtiba nung anepaluogo, nenok ajak den mulungnen lemsateper. Onoki ojala anepalutetsü mapang talila ngutetbaji nenok anepaluyim ajungaba ajanga ta mulungsüa bilemer. Onok dang nungi jilia or alir temeimbatem den temeim ojalabo atongsemogo.

Teyanglur Tsüngrem shibai la yanglu aser la taküm piyong meima aru, Pa tenüng onoki asanger. La onok den aliba ajanga, onok taküm kanga moatsüogo. La mapatem onok den teti taküm alitsü. La onok mulungjang nung teti alitsü. Teti meima alitsü, teti munungraa bilemtetsü.

Temulungjang taroktiba nungi maneni tepela lemsateper

Asür Wt. Temjennaro-er kibong & kinungertem.

Iran nunger rongnirtem Sri Lanka nungi kidangi meyipa ogo

Colombo, Rongchii/April 15 (Agencies): Warship ana nung mena aliba Iran nunger crew member 200 dak tema shirnok Sri Lanka-i kümzüka liasü, parnok kidangi meyipa yokogo, ta ketdangsür kati Bodhbarnü metetdaksü.

U.S indang submarine ka nungi torpedo ka agi March 4 nü warship IRIS Dena dak kongshiba sülen Sri Lanka-i iba rong nungi Iran nunger 32 kümzüka liasü.

U.S.-Israeli nati Iran amakba sülen iba rong ya India-i ayongzüka naval exercise ka nungi kidangi meyipa oya aliba mapang maka liasü.

Sri Lanka-isa, ano March 5 nü tanabuba rong; IRIS Booshehr nungi crew 208 kümzüka. Iba rong ya engine nung timtem adokba sülen parnoki Colombo dang teyari meshia liasü.

"Rong anaprongla nungi crew tem Mongolbar aonung 11 ako shi nung tayimtsü ka nung yokogo," ta Deputy Defence Minister Aruna Jayasekera-i Reuters dang ashi.

Crew tem ya Colombo-i anir aruba sülen IRIS Booshehr ya Sri Lanka anütoklen Trincomalee tzükümi atsür oa liasü.

"Inyakyim nung teyari agütsütsü atema Iran nunger crew 8-10 shi rong nung lir," ta Jayasekera-i shisem.

Sri Lanka-i, item Iran nungertem nem ya anogo 30 atema visa agütsü aser parnok meyok tsüngda navy aser air force camp tem nung anenzükdakja liasü.

Kasa mapang nung US-i amakba mapang asür nisung 84 tasümgang Iran-i achaayanga tayimtsü ka nung Dena nungi benerogo.

Russia-i drone 300 dak tema yoka Ukraine amak



Kyiv, Rongchii/April 15 (Agencies): Russia-i manger mesangwa tsüngda drone noklang aika aser ballistic missile asem yoka Ukraine kübok rongnendak infrastructure makogo. Iba mapang nisung ka tepset aser nisung tenet yiruja liasü, ta Ukraine nunger ketdangsürtemi metetdaksü.

Russia-i Mongolbarnü nikongtsütsü 6 ako nungi tenzüka drone 324 aser ballistic missile asem yoka liasü, ta Ukraine air force-i ashi. Air defence unit temi drone 309 khazüka yok saka missile tem aser drone 13-i tesem teku dak kongshia liasü, ta kasa sangdong ajanga metetdaksü.

"Taoba ghonda 24 tsüngda Dnipro, Cherkasy, Kharkiv, Kryvyi Rih, Chernihiv, Donetsk region, aser Zaporizhzhia tesem kanga mejungi makogo," ta tir Volodymyr Zelenskiy-i X nung sangdong ka ajanga metetdaksüba den, Ukraine indang air defences akangshitsü asoshi teka ameteper inyaksüji ajak dang tongtibangtiba lir, ta shisem.

"Onoki air defence missiles anogoshia nüngdaker. Russia-i anogoshia onok yimitem amaker," ta pai ashi.

Mongolbarnü Ukraine aser Germany nati defence dak sendakba nung teka amteper inyaksü mulungtepogo aser Kyiv-isa Norway nung drone yanglutsü mulunga agizükogo.

Kasa mapang nung Bodhbarnü Zaporizhzhia yimti amakba mapang arishi küm 74 tain tetsür ka kiosk ka nung

tepsetogo, ta iba tesem governor Ivan Fedorov-i Telegram messaging app ajanga metetdaksü.

Fedorov-isa, iba yimti amakba mapang gari anendak ka, shishilembadak aser iba anasa aliba nisung aliba ki ka aser shisaluyim riju ka raksaogo, ta ashi. Paisa, merang agi yangluba structure teraksa ka, kichiba raksar aliba ki ka aser gari teraksatem indang noksa lemsatepa liasü.

Regional prosecutor temi ashiba agi, yimti ya anepdang 5 ako shi nung drone aser missile naprongla amshia maka liasü.

Ano Dnipro yimti nunga Russia-i drone amshia manger mesangwa tsüngda tesem balala amakba mapang nisung asem yiruogo, ta governor, Oleksandr Ganzha-i ashi.

Ganzha-i ashiba agi, drone tem yagi tekuben atongtepa tua sür aliba apartment ki ka aser administrative ki raksatsü.

Mongolbarnü missile ka agi iba yimti maka nisung pongu tepsetba den nisung 30 shi yirutsüba sülen maneni maka liasü.

Maneni Cherkasy yimti nunga drone temi tesem balala amakba sülen nisung pezü yirua mozükidangi temang anepalutsü asoshi aotsüsa aküm, ta governor Ihor Taburets-i metetdaksü. Paisa, nisung aliba ki aser gari agika raksatsüogo ta ashi.

Mongolbarnü drone agi iba yimti amakba mapang arishi küm ti tain tebur chanu ka asü aser nisung 14 yirua liasü, ta Taburets-i ashi.

GOVERNMENT OF NAGALAND DIRECTORATE OF URBAN DEVELOPMENT NAGALAND: KOHIMA

No.UD/ESTT-14/GR-IV/2019/ (Pt)

Dated Kohima, the April 2026

ADVERTISEMENT

In pursuance to the Govt. approval vide Letter No. UDD/2-ESTT/07-Appt/2022/52 Dated 10.02.2026, applications are hereby invited for filling up the post of **MTS (Group-D), District Pay Level-1(15500-49400)** under the Directorate of Urban Development.

Sl. No	Name of Post	No. of vacancy	Place of Posting	Pay Matrix	Remarks
1.	MTS	1	Directorate	15500-49400	Indigenous inhabitant of Nagaland

Eligible Criteria:

1. Minimum education qualification : Class-VIII passed.
2. Age limit 18 -32 years as on 01.01.2026 (Upper age limit is by 5 years in case of ST Candidate and Government Employees shall be as per Government Office Memorandum)
3. Mode of Selection: Viva voice
4. **Documents Required :-**
 - a) Educational qualification certificate
 - b) Birth Certificate
 - c) Indigenous Inhabitant/ Scheduled Tribe/ Backward Tribe Certificate
 - d) NOC from HOD for Government employees(in original)
 - e) 2 Nos of recent passport size photos
5. Application form will be issued from the Directorate of Urban Development (Establishment branch) during office hours **w.e.f 17.04.26.**
6. Last date for receipt of applications shall be **30.04.26.**
7. Incomplete documents or application received after closing date shall be summarily rejected.
8. The Department will notify the date of Interview in due course of time.

Sd/-
(TARACHU FITHU)
Director
Urban Development
Nagaland: Kohima

North Korea-i nuclear arms yanglutsü tashi ulushir: IAEA

Seoul, Rongchii/April 15 (Agencies): North Korea-i atomic weapons yanglutsü tashi ulushiba nung temulung kanga agütsüba sayur, ta International Atomic Energy Agency (IAEA) tekolakba Rafael Grossi-i ashi.

Linük balalai senzüka yutsüba linük nungya uranium tashi tuluba kumdaksütsü atema facilities aika lapoka lir südi ta amanger, koba nuclear warheads yanglutsü atema tongtipang mera ka lir, ta South Korea indang itdangiter temi shia lir. Item rongnung Yongbyon nuclear site ya ka lir, koba jembishinü akaba sülen Pyongyang-i shibang saka 2021 küm lapokshi.

"Onoki mapang shia asadanga nung, Yongbyon reactor nung operations kanga kera timba akumba jangjateter," ta Grossi-i Bodhbarnü Seoul

nung osangbener dang ashi.

Yongbyon indang reprocessing unit aser light-water reactor nung inyakyim tali akumba aser danga facilities nung mapa inyakba onoki ajitetogo, ta Grossi-i ashi.

"Item ajak yagi DPRK nung nuclear nok-nü yangluba tuyur, kong warheads dozen ishika lir ta asadangteta lir," ta pai North Korea indang official tenüng amshia ashi.

North Korea-i 2006 küm mezüngbuba nuclear tendanga liasü, aser pari nokdanga aliba nok-nü sentongtem mechi United Nations-i sanctions balala agüja lir. Pyongyang-i par nuclear nok-nü kodanga bendanga magütsütsü ta sangdong aser 2009 küm nungi IAEA inspectors tem oa nuclear facilities semdangtsü memelar.

Yongbyon nung aliba enrichment facility mesük facility tasen ka yangluba agency-i ajitetogo, ta Grossi-i ashi.

Tesem oa mesemdangi production timba kumdaksüba asadangtsü temela masü.

Ajisüaka facility tema tereprangtsü nung repranger DPRK indang enrichment capacity kanga tali kumogo südi ta angateter, ta pai ashi.

North Korea indang nuclear maparen nung Russia-i yarir asü masü ta asüngdang dang, IAEA-i iba dak sendakba nung kecha mangu, ta Grossi-i langzü.

Russia-i Ukraine amakba nung yaritsü atema North Korea-i ground troops aser artillery shells tem yoka lir aser iba melen Moscow-i Pyongyang nem military technology teyari agütsür ta aikati ashir.

Abhishek aser Axar na NADA RTP nung züngoksemogo



Rongchii/April 15, 2026

(Agencies): T20 World Cup asayaba India team nungi asayar Abhishek Sharma aser Axar Patel na National Anti-Doping Agency's (NADA) Registered Testing Pool (RTP) nung züngoksemogo, kong athletic tem timba lir.

Abhishek aser Axar nati Smriti Mandhana aser Shreyas Iyer na melena RTP list nung aliba asayar 348 rongnung densemogo. Item asayatem yagi parnok kolen ali aji anti-doping agency den lemsatepsüla aser anogoshia mapang tatakzük ka nung testing atema parnok azünga alitsüla.

Asayatem kong ali aji asemben tashi memetdaksüra doping nung

aibelen ka ama züngshir.

Iba list nung tanga cricket asayatem tenüing memelenshi lir, kong Test aser ODI capytain Shubman Gill, Yashasvi Jaiswal, Hardik Pandya, Rishabh Pant, Jasprit Bumrah, K L Rahul, Arshdeep Singh aser Tilak Verma nung densemaga lir.

Tetsür team nungi all-rounder Deepti Sharma aser Shafali Verma na den Renuka Singh Thakur densemaga lir. Ajak senteper NADA list nung cricket asayar 14 züngoksemaga lir.

Taoba NADA RTP nung athletic asayar 118 liasü, saka tang 134 junogo, kong steeplechaser Avinash Sable, hurdler Jyothi Yarraji, decathlete Tejaswin Shankar aser sprinter Animesh Kujur nung

densemaga lir.

Long jumpers Shaili Singh aser M Sreeshankar, discus thrower Tajinderpal Singh Toor nungera list nung lir.

Pool nung archer tem rongnungi Deepika Kumari, Rakesh Kumar, aser para-archer Sheetal Devi nung lir.

Hockey asayar-a Manpreet Singh, skipper Harmanpreet Singh, Amit Rohidas and Hardik Singh aser tetsür team captain Salima Tete, Savita Punia aser Navneet Kaur nung lir.

P V Sindhu, Lakshya Sen aser Gayatri Gopichand nung densemaga badminton asayar ti lir.

Maneni iba list nung boxer 22 aser Wrestlers 31 züngoksemaga lir.

Viktor Axelsen professional badminton asaya nungi anisüngzük



Rongchii/April 15, 2026

(Agencies): Olympic nung gold medal ana ngur aliba badminton asayar Viktor Axelsen-i Bodhbarnü pa professional badminton asaya nungi anisüngzükba sangdongogo. Pa maneni asayatsü atema temangi memelar ta shia asaya nungi anenba osang metetdaksü.

Axelsen ya tebur kija asayatem rongnung tajungtiba ka ama asaya nungi

anisüngzük. Pai olympics aser world championship anabenben kokogo,

European championship asemben kokogo aser iba den Thomas Cup-a kokogo. Pa ya mapang talang ka world No. 1 asayar liasü.

Axelsen indang professional career ya 2010 küm tenzük aser küm 16 shi asayaba mapang pa ya tour nung ajaki tsübuba asayar ka aküm.

"Ni teberem nung maneni timtem adokba ajanga temaba

jenjang nung training agia toktepa asayatsü mekoki kümogo. Endoscopic surgery, injections aika agiba den training method tasen benoka inyakogo aser treatment-a balala mapang talangka agia aruogo. Kü dang tarutsü nung health atema rangloker inyaksü shiogo," ta Axelsen-i Instagram nung post ka ajanga metetdaksü.

Axelsen ya taoba küm October ita French Open, kong pa külem Denmark nung asayar Anders Antonsen-i quarterfinal nung tsükdakja liasü, iba asayamung asayaba sülen khen danga asaya mali, aser pa World No. 50 ama asaya nungi anisüngzük.

"Aikati meteta aliba ama ni teberem nung timtem yagi joko mapang tatsükabo kangshia arudar. Taoba küm Arpil ita surgery agiba sülen ni rehabilitation mapang talangka agiogo, saka tia maka ano October ita yirushia liasü," ta Axelsen-i Badminton Europe den sensaksema mapang ashi.

October ita Axelsen-i, pa season kara tembanger ta ashiba den 2026 küm dak rangloker jenjang agitsü, ta ashi saka küm tasen tenzükba sülena pa masayatetsüsa aküm.

France nung asayar Ekitike yiruba sülen World Cup masayatetsü

Rongchii/April 15, 2026

(Agencies): France nung international Hugo Ekitike, Liverpool pur Champions League nung Paris Saint-Germain makokba asaya nung Achilles tendon yiruba sülen pa taküm FIFA World Cup masayatetsü.

French osang kaket Le Parisien aser L'Equipe nati arishi küm 23 tain asayar yiruba osang ya Bodhbarnü metetdaksa liasü.

Ekitike-i tang asaya aliba season nung Liverpool atema tetoktepba ajak nung goal 17 idaktsür lir. Pa taoba küm July ita Eintracht Frankfurt nungi pound million 69 agi alizüka liasü.

Mongolbar aonung Anfield nung Paris Saint-Germain den quarterfinal tanabuba leg asayaba mapang Ekitike yiru aser pai medical staff tem dang Achilles tendon nung timtem aliba metetdaksü aser iba sülen pa stretcher nung bener

tugua liasü.

Liverpool puri tanabuba leg ya-a goal 2-0 agi mekoki parnok aggregate nung 4-0 agi PSG-i kokogo.

Ekitike yiruba dak sendakba nung French football federation (FFF)-i osang agütsüba mapang tashi nung kecha telangzüba magütsü liasü.

Taküm World Cup ya United States, Mexico aser Canada nung June 11 nungi July 19 tashi asayatsü.

Ekitike-i tang tashi nung France tenüing nungi asayaba mapang goal ana idaktsür lir. Pai Ukraine den World Cup qualifier nung ka aser Brazil den friendly asaya nung goal ka idakja liasü.

Pai tang tashi nung linük team nungi tiben asayar lir, saka taoba asaya trok nungi asem nungbo tetenzük nungi asaya aser pa ya Real Madrid striker Kylian Mbappe sülen striker tem rongnung tongtibangtiba ta züngshir.

UEFA Champions League: PSG aser Atletico na semifinal-i iogo

Rongchii/April 15, 2026

(Agencies): Mongolbarnü UEFA Champions League quarterfinal tanabuba leg nung Paris Saint-Germain-i Anfield nung Liverpool koka parnok semi-finals-i iogo. PSG-i iba asaya ya 4-0 aggregate agi kokogo.

Iba asaya nung Ousmane Dembele-i kanga junga asaya-a PSG atema goal anaprongla ya pai idakja liasü.

Asaya nung tia maka asaya mezüngbuba shilem nung Liverpool nungi asayar Hugo Ekitike yiruba ajanga parnok jenjang mejungi kümdaktsü. Mohamed Salah shiba club nungi Champions League asaya tatembangbuba asaya liasü, pa asaya nung kara kara aniksüsa aküm aser pai goal idaktsütsü asoshi maongka aika yangluteta asaya saka parnok goal magütsütet.

Goal idaktsütsü meranga Liverpool pur asayatem tejakleni tur asayaba mapang PSG nungi asayar Dembele-i minute 72buba nung box tema nungi mezübuba goal idaktsü aser paisa mapang apuloktsür asayaba mapang tanabuba goal idakja parnok asaya akok.

PSG pur semi-finals nung Bayern Munich mesüra Real Madrid den asayatsü.

Kasa asayamung tanga asaya ka nung Atletico Madrid

pur küm teku sülen tang mezüngbuba UEFA Champions League semi-finals tongtetogo. Barcelona den tanabuba leg asaya ya parnok goal 2-1 agi makok, saka 3-2 aggregate nung parnok iba asaya koka liasü.

Diego Simeone-i aniba team yagi mezüngbuba leg goal 2-0 agi koker liasü, saka Barcelona puri yakta dang goal ana ya küptok.

Asaya tenzük minute pezübuba nung defender Clement Lenglet-i aibelenba sülen Lamine Yamal-i mezüngbuba goal idaktsü aser Ferran Torres-i minute 24buba nung tanabuba goal idakja liasü.

Ajisüaka Atletico Madrid puria kanga tashi ita telangzüba agütsü aser minute 31buba nung Marcos Llorente-i agütsüba ball ka Ademola Lookman-i kanga junga idakja liasü.

Pedri, Gavi aser Dani Olmo nungeri midfield ya azüoka asaya tanabuba shilem ya-a Barcelona puri amokbanger asaya saka parnok tasembuba goal magütsüteti asaya tembang.

Atletico pur semifinal nung Arsenal mesüra Sporting den asayatsü.

Parnoki tang tashi nung Champions League khen danga koka mali, saka taküm iba asayamung akoktsü maongka lir.

BILEMDANGANG

"Na tekübokba jenjang nung aliba mapang nü tembarji shiba aji jangjar."